



Gemeinsam Äntwert vun der Madamm Ministesch fir Ëmwelt, Klima an nohalteg Entwécklung, Carole Dieschbourg, dem Här Energieminister, Claude Turmes, der Madamm Inneministes, Taina Bofferding, an dem Här Minister fir Mobilitéit an öffentlech Aarbechten, François Bausch, op d'parlamentaresch Fro n°5306 vum 29. November 2021 vun den éierewäerten Deputéierte Fred Keup a Jeff Engelen iwwer "Chaudières à pellets"

1) Kann d'Regierung hir allgemeng Positioun zu Pelletheizungen elaboréieren?

D'Prioritéit vun der Regierung läit op der sougenannter Kaskaden-Notzung, dat heescht d'Holz soll prioritär als Rohstoff fir Materialie benotzt ginn. Eréischt um Enn vun der Kreeslafnotzung ginn déi Materialien, déi soss kenger anerer Notzung méi zougefouert kënnen ginn, an déi energetesch Notzung. Hei zu Lëtzebuerg gi Pellets gréisstendeels aus Hëlzer fabrizéiert, déi net fir eng stofflech Verwärtung gëeegent sinn.

Pellets, a méi generell d'Biomass, also d'Holz, sinn ee begrenzt verfügbare Rohstoff a sollen och deemtspriechend agesat ginn. Pellets sollen do an den Asaz kommen, wou et keng aner gutt Alternative gëtt, fir erneierbar Hëtzt ze produzéieren. Dofir solle Pelletsanlage prioritär am Bestand agesat ginn an net an neien Haiser. Bei den Eefamilljenhaiser ass d'Referenzanlag fir ze heizen eng Wärmepompe, an dofir gëtt vun 2022 u keng Pelletheizung méi an neie Wunnegebaier subsidéiert.

Pellets an Holz ginn och sënnavoll a Wärmenetzer agesat, virun allem do wou geschützte Gebaier sinn, déi een nëmme schwéier energetesch sanéiere kann.

D'Regierung favoriséiert d'Verbrenne vu Pellets vis-à-vis vun Holzhackschnitzel oder Stéckholz, well et méi eng kontrolléiert a propper Verbrennung ass. An deem Kontext gëtt am Kader vun de staatleche Subventiounen (PRIME House) vun 2022 un zousätzlech ee Filter fir nei Pelletheizunge virgeschriwwen, an d'Norüste vu Filtere bei bestoenden Anlage gëtt och subsidéiert.

2) Ginn et zu Lëtzebuerg öffentlech Gebaier vum Staat oder de Gemengen, déi mat Pelletheizunge gehëtzt ginn? Wa jo, ëm wéi eng Gebaier handelt et sech? Iwwert wéi eng energieetesche Leeschtunge verfügen déi eenzel Anlagen?

An der Heizungsdatebank (7 kW bis 1 MW) vun der Ëmweltverwaltung (AEV) sinn aktuell ronn 1.100 Pelletheizungen enregistriert, wouvun der manner wei 40 an öffentleche Gebaier stinn.

Ausserdeem publizéiert d'AEV op hirer Internetsäit (<https://mcp.aev.etat.lu/MCP>) ee Regëster mat all den Heizungsanlage vun iwwer 1 MW bis 50 MW déi mat Mazout, Gas oder Holz bedriwwen ginn. Am Regëster ginn am Moment 7 Heizungsanlage gelëscht, déi mat Holz (Stéckholz, Hackschnëtz, Pellets) bedriwwen ginn, mee dovu sinn déi meescht a privater Hand.

Aktuell sinn 9 Pelletheizungen a Gebaier installéiert, déi ënnert der Gestéiung vun der Verwaltung fir öffentlech Baute stinn. D'Gesamtleschtung vun deenen Heizunge beleeft sech op 1.324 kW.

Centre Mariendall	500 kW
Ligue HMC zu Capellen	200 kW
Klierfer Lycée	50 kW
Lycée Hubert Clement zu Esch-Uelzecht	400 kW
Maison Geimer zu Senneng	26 kW
Maison d'enfants zu Schëffleng rue des Fleurs	8 kW
Maison forestière zu Marscherwald	30 kW
Dépôt des ponts et chaussées zu Iechternach	60 kW
Service central des imprimés zu Leideleng	100 kW



3) Ass d'Ausrüstung vu weideren öffentleche Gebaier vum Staat oder de Gemenge mat Pelletheizunge geplangt? Wa jo, ëm wéi eng Gebaier handelt et sech? Iwwert wéi eng energeetesche Leeschtunge sollen déi geplangt Anlage verfügen?

Zurzeit sinn, an öffentleche Gebaier vum Staat, konkret 7 weider Pelletheizunge geplangt, an zwar op folgende Siten:

Site Geesseknäppchen	2.700 kW
Site vun der Fondatioun Kräizbierg zu Diddeleng	480 kW
Maison de soins zu Nidderkäerjeng	200 kW
Site vum Édupôle zu Walfer	1.550 kW
Jugendherberg zu Veianen	400 kW
Police Syrdall	40 kW
Internat Jacques Brocquart	80 kW

Iwwer geplangten Installatioune vu Pelletheizunge bei de Gemengen huet de Staat keng Informatiounen.

4) Verfüügt Lëtzebuerg iwwert eng eege Produktioun fir Holzpellets?

Jo, d'Firma Kiowatt vum Rouscht produzéiert Holzpellets.

5) Aus wéi enge Länner huet Lëtzebuerg während de Joren 2018, 2019 an 2020 Holzpellets importéiert? Kann d'Regierung eng Tabell presentéieren, déi déi eenzel Länner, souwéi déi jeweileg Importzuelen mat dem bezuelte Präis pro Tonn regruppéiert?

De STATEC verfüügt iwwert d'Enquête Intrastat, déi all Joer bei de Betriber duerchgefouert gëtt, iwwer Import Quantitéiten an den Duerchschnitts-Import-Präis vu Pellets.

Eenheet [t]	2018	2019	2020
Import (Total)	7.914	6.420	10.853
Däitschland	996	674	2.201
Belsch	6.396	5.585	8.434
Frankräich	5	8	3
Holland	10	9	14
Dänemark	10	0	10
Italien	0	0	1
Polen	0	144	190
Portugal	497	0	0
Duerchschnitts-Import-Präis [EUR/t]	220	217	219

Ze erwänen ass an deem Kontext, datt hei zu Lëtzebuerg vun deem virgenannten Acteur ronn 60.000-70.000 Tonne Pellets am Joer produzéiert ginn, wouvun am Moment och ee klengen Deel exportéiert gëtt. De Bedriewer huet eis matgedeelt, datt awer zukünfteg déi gesamt Pelletsproduktioun um nationale Marché kann ënnerbruecht ginn.

Lëtzebuerg, den 11. Januar 2022
(s.) Carole Dieschbourg
Ministesch fir Ëmwelt, Klima an nohalteg Entwécklung